



**KA HISTORI
JONG KA
KHASI—JAINTIA
BAD ASSAM**




NA KA BYNTA KI KLASS IV, V & VI

DA

U BAH FRANK M. PUGH

JAIW, SHILLONG

Ka dor 2T.




Ka Khasi—Jaintia

1. KI KHASI KI WAN NANGNO

Ka ri Khasi ka long halor ki lûm Khasi Jaintia, ba la ker na shatei, na mihngi bad shathie da ki ri thor Kamrup, Nowgong Kashar bad ka Shilot (ne Sylhet, ba la khot noh mynta Bangladesh) ; katba na sha sepngi pat la don ki lûm Garo. Ha ka ri Khasi-Jaintia don shibûn ki syntai lûm, uba jrong tam na ki u long u Lûm Shillong uba don hamar pdeng jong ka ri. Ki wah ruh ki don shibûn, kaba heh tam na ki ka long ka wah Kupli sha mihngi bad ka Wah Rilang-Kynshi sha sepngi.

Ki lûm ki long kiba itynnat ; hynrei ka jaka kam seisoh kum ha ri thor. Kumta ki briew kiba shong ha ki lûm ki kylla long kiba eh, ba shait, bakhlain bad baksah. Ki ioh ia ka bâm da ka jingtrei shitom. Hynrei kim ioh suk kum ki briew kiba shong ha ki ri thor, ha kaba lah ban ioh u khaw u kba bad ka dohkha dohpnat kyrhai. Ha ki lûm ki hap rep phan, riewhadem, sohriew tad ki thung ki diengsoh bad ki pai khamtam ha ki ranab lûm.

Library books will give you Joy for Long
If handled carefully with clean hands



Ka map Ri Khasi-Jaintia

Hynrei ka don ka jingiakhaii pateng, ka ia thied ka iadie bad ki briew kiba na sha ri thor, wat la ki iapher ha ka ktien ka thylliej, ha ki rukom im, ha ki dustur bad ha ka niam.

Ka la long ka jinglyngngoh hapdeng ki riewstad mynta ban iit nangno ki Khasi ki wan nyngkong eh Ka jingiathuhkhana ,hiar-paterg ka ong ba mynnor eh u Khasi bad u Dkhar ki iawan jngi lyngba ka jingshlei um ka bakhraw. Ha kata ka jingiajngi, u Dkhar u buh ia ka kot halor ka jaiñspong. U Khasi pat u kbum ia ka ha ka shyntur. Katba nang ia jngi kumta, u Khasi u kum nguid noh ia ka kot shapoh kpoh. Hana, dei na kata ka daw ba u Khasi um don kot don sla, jingthoh jingtar shuh. Haba u leh niam leh rukom bad u sneng u kraw, ka jingstad ka mih napoh jong u, um shu pule kumba leh ki para briew sha ri thor. Kumta naduh kata ka por ki jah bad duh noh ka jingnang ban thoh dak bad bar, pule kot.



U Papuan na shaphang Philippines

Na ka jingiit ki riewstad pat mynta ki ong ba la kumno kumno ki wan nyngkong na sha

shiliang ka Bay jong ka Bengal na shaphang mihngi shuh shuh. La shem ba ki Khasi Pnar ki iajan ha ka ktien ka thylliej, ka dur ka dar bad ha ki dustor tad rukom im bad ki briew kiba shato, kiba na sha Loas.

2 KA HIMA MALYNGNGIANG NE MADUR-MASKUT

(Kumba 1500-1650 H K.)

U Mailong Raja bad u Kyllong Raja.

Ha kawei ka por la don kawei ka hin a kaba donbor shibún ha ri Khasi Jaintia Ka la long ka hima barim tam ba ngi lah ban ioh-sngew ha ki ri lúm jong ngi. Ka kyrte g jong kata ka hima ka la long ka hima Malyngngiang ne Madur Maskut La ju khot ia ki syiem jong ka ki Syiem blei. Ki la synshar naduh ri thor Nowgong lyngba ki lúm Khasi Jaintia shaduh Shilot (Sylhet).

Ka nongbah jong kane ka Hima Bah ka kyrte g ka law-dai-ja hajan Wahiajer mynta, ha'or uwei u lúm. Kawei ka syiem kaba khlad na kane ka hima ka la leit seng hima ha Mawsynram.

U Syiem uba nyngkong eh jong ka, ba ngi tip u long u Mailong Raja. Une u syiem u la long uba donbor shibún bad u ba khraw bor

eh ha kaba pyniar hima. Ka hima jong u ka la ialong markhap pud bad ki Syiem Jaintia. U Syiem uba synshar pat ha Jaintia ha kata ka por u la long u Syiem Markuhain.

Une u Mailong Raja u la khroh ia u Syiem Markuhain uba shong ha Nartiang ban wan iakren pynbeit ia ka jingiakajia pud hapdeng jong ki sha law-dai-ja. U Syiem Markuhain u la lum ia ka dorbar ki hynñiew doloï kiba hapoh jong u ban iapyrkhat shaphang kane. U Doloï Jowai u khang ia u ban leit bad u la ai buit ban phah tang da ki doloï. Hynriew ki doloï ki la ialeit bad ki la pynriam syiem shynrang ia u Kaia Bandesi bad syiem kynthei ia ka Lipang Rani.

Tang shu poi ma ki u Mailong Raja u pynkhreh ka khawai dawai bah bad pyndih buaid ia ki baron phar. Nangta u phah pyniap lut pat kdar-dar dar ia ki baroh.

Ka khubor ka la poi sha u Syiem Markuhain ia kane ka jingjia bad u la khreh phet ; hynrei u Doloï Jowai u khang biang ia u. Ki la iakhreh phraphew ngut ki rang kieng-wait kieng-stieh bad la phah ia ki sha law-dai-ja bad ki ar ngut ki shakri u Mailong Raja kiba na Jowai. Hamar ba ki dang iabuaid ja hapdeng ka jingkmén bakhraw, kine ki arngut ki shakri

ki la pyllait tuh ia ki rang ialehthma na Jowai kiba la pom lut ia u shnong u thaw bad wiang ding katba ki dang iathiah mynmiet.

U Syiem Malyngngiang uba sah miet ha kata ka por ha Mawdymma', u la phet nador u kulai, tang shu iohi ia ka tдем ding ba ka klang ha shnong jong u. Hynrei ki rang-kieng-wait na Jowai ki la ap lypa ha lynti bad tang u shu poi ma u, ki pom ia u ar dkhot tad rah ia ka khlieh jong u sha Jaintiapur.

Hadien jong u la mih bujli da uwei u Syiem bashynrang hi sriem kum ma u. Ka kyrteng uta u Syiem ka long u Kyllong Raja.

Une u Syiem u la long uba khlain palat. Ym ju lah pyniap duh ia u. La ong, ba mynta i kumba la pyniap ha ka thma, ynda lashai iohi ia u ba u iaiaid pa iaiaid biang kum bam shym lei lei. Kane ka la pynlyngngoh shibún ia ki Jaintia.

Khatduh khatwai ki la thaw da ka buit kumno ban jop ia u. Ki la pynkhreh da kawei ka thei samla babhabriew tam bad bashalak tam jong ka thain Jaintia. Ki la suhbuit ia ka ba kan treh ban leit long mahadei ia une u syiem. U Syiem Kyllong Raja de u la ngat ha kane ka buit. U la iashem ia ka ha law-dai-ja ha Iew Madur-Maskut bad u la pynlong mahadei ia ka. Ka de, suki suki ka la ioh tuh

na u ia ka jingtip shaphang ka jingkhlain bor
 jong u bad ka la ai jingtip ia kata sha ki Jaintia.
 Da kata ka buit la ioh ban pyniap ia u Kyllong
 Raja katba u dang leit sum ha kawei ka wah
 hapoh khlaw. Ka hima Madur Maskut te
 ka pra bad sapra naduh kata hi ka por artat.

3. U NIANG RAJA KA HIMA JAINTIAPUR.

(Kumba 1500 H. K. ei ei).

U Niang Raja u long u Syiem Jaintiapur
 badonnam shibun. Ym ju lah satia ban
 pyniap ia u. Ki Syiem Sutnga kiba ha ki ri
 lum Jaintia ha kata ka por ki la pyrshang ban
 pyniap ia u, hynrei kim ju lah. Kumta ki la
 shu thaw noh da ka buit. Ki la wad ar ngut
 ki samla kiba sian shibun. Ki la pynbeit ba
 kin leit shong shakri ha ka Mahadei u Niang
 Raja. Ka Mahadei ruh ka la pdiang ia ki kum
 ki shakri iing.

Kine ki shakri ki la trei bha katta katta ia
 ka kam. Ki lah ban kem ia ka jingiei bad
 jingshaniah jong ka Mahadei Ha kawei ka
 sngi ki la kylli twad buit ia ka hangno ka bor
 u tnga jong ka ka don. Ka de ba ka shaniah
 ia ki ka la iathuh. Ka iathuh ba u shait leit
 sum marwei sha kawei ka jaka bakynjah. Ym

ju don manō manō ba tīp hangnō kata ka don.
 Dei hangta ba u buh noh la ki tiar ki tar ialeh
 thma, khlem nongap.



Ki Mawbynnā ba ha Jaintiapur.

Kita ki samla de ki la khroh ia ka Mahadei ban iathuh hangno kata ka jaka ka don. Kaba pli ka Mahadei bashida jinglong ka la kum iathuh sor bad ka la khang iap khang im ia ki ban nym leit jan shata. Bad ki la kular de ban leh kumta ia ka.

Ynda ha kawei ka sngi, sor ki la leit iapar tuh ban leit shata sha ka jaka ba u sum. U tang shu iohi ia ki, u rynsied pum hapoh um bad ngam thlaw artat hangta. Kumta mar mar ki wan iathuh ha ki Syiem Sutnga. Ki Syiem Sutnga de ki la iakmen bad ki la leit dokhol ia ka hima jong u kaba sha ri thor Naduh kata ka por ka hima Jaintiapur ka háp hapoh ka jingsynshar ki Syiem ri lúm kiba na Sutnga.

4. U MARKUHAIN BAD U SAJAR NANGLI JONG KA HIMA JAINTIAPUR

(Kumba 1516-1532 H. K.)

Don uwei u Syiem Jaintiapur bakhrawbor uba kyr teng u Syiem Markuhain. Hapoh jong u la don hynñiew ngut ki doloí. Une u la long u Syiem Samla ba dang marwei bad u la wad Mahadei. U iohi ba don kawei ka khún kynthei u Sajar Nangli baiabiang kyr dan bad u. U la phah da la ki brierw jong u ban twad jingmut na u Sajar Nangli Hynrei u Sajar

Nangli um mon ban ai la ka khún kynthei bamarwei jong u ha u Syiem.

U Syiem u la pynmih hukum ban shna kawei ka nan ha Nartiang. U Sajar Nangli bad la ki paid babún jong u, u la pyndep hapteng khyndiat sngi. Kane ka la pynsgewbha ia u Syiem Markuhain. U la khreh ka khawai ka dawai kaba khraw ban ai burom ia u Sajar Nangli bad ia ki paid jong u. Nangta u khroh ia u Sajar Nangli ban sah miet, hynrei um treh.

Nangta u Syiem u la thap ban shu phah knieh jubor ia ka khún kynthei jong u. U Sajar Nangli nangta tang iohsgew ia kata u la khreh phet noh. U la lum la u paid babun ban ialeit ryngkat bad u. Kine ki la iateh jutang ban nym iehnoh lyndet lyndang ia u. Ki la iatih nan kawei tang mar shisien tih da la ki tdong ryntieh. Ia kata ka nan la khot haduh mynta ka Biar u Sajar. Ka jingbun jong uta u paid, la ong, ka la long kaba khraw shibun. Don uwei u synrei ba ki buh pyngkiang lynti ha ka lynti iaid jong ki. Da ka jingiañuh u paid babun da la ki pohjat jong ki, uta u synrei u la lut artat khoit.

U Sajar Nangli bad u paid babun u ialeit shaphang sepngi na Raliang bad hana, ki leit seng hima pat ha Khatsawphra.

5. U BORSINGH SYIEM KA HIMA SOHRA.

(Kumba 1731-1770 H. K.)

U Borsingh Syiem u long u Syiem Sohra uba khrawnám. Ha ka por ka jinglong syiem jong u, u Syiem Borkusain bad ka pəra jong u ka Kong Rimai na ka hima Jaintiapur ki shah set ha Nongkrem ha ki Syiem Shillong. U myntri rangbah jong ki uba kyrteng u Lyngskor Potiphas u la leit khroh ia u Borsing Syiem na Sohra ban pyllait ia u. U Borsing Syiem de u ai buit ia u kumno ban iakynduh bad u Syiem Borkusain. U bthah ia u ban riam pukir bad ban leit rwai dkhar ha Nongkrem. Tang shu iakynduh ia u Syiem Borkusain un iatehkular katno un ai lada pyllait ia u.

U Potiphas de u la leit bad ioh ktien ba un ai katto katne ki shnong ha ri dkhar sha u Syiem Sohra. Kumta u Borsingh Syiem u la phah biang ban leit sha Nongkrem kumba mynshuwa. Tangba ha kane shhsien un da pyndih buaid ia ki nongset byndi jong ki Syiem (kiba la shah set hapoh sem sniang). U ong artat ba ki tang shu lait kin ialeh ban ryngkang sha ka pud u Syiem Sohra uba dang ap bad la ki paid iapom jong u.

U Potiphas uba la leit bad ki katto katne ki lok de u la leh, kumba la bthah. La pyndih buaid ia ki nongap. Ki la thlieh ia ka jyngkhang. La pynkit ia ki Syiem Jaintiapur sha ka pud Sohra bad la ialam ia ki sha Sohra.

Ha Sohra ki iashong shipor. Hynrei ki kwah ban leit phai noh sha la shnong. Kumta ki la ialeit ryngkat bad u Borsingh Syiem La ialam ruh ia u Piah Lyngskor na ka hima Sohra ban iasynran lang ia u Syiem Sohra.

Ha ka jaka ban ai ia kita ki jaka, u Syiem Borkusain u shet kylla pynban. U iawer leit behmrud ban iashong mar la ka lieng. Ia u Borsingh Syiem ia pynpoi sha Shilot bad la set ha ka kut u jamindar Sujlar. Ia lade pat u wan phai sha la shnong ha Jaintiapur.

U Piah Lyngskor u la sngewlyngng oh balei ba wan phai shnong tang u Syiem Borkusain bad ba u Borsingh Syiem um wan phai. Kane ka la pynklusai jingmut ia u. U la leit wad ia u Syiem Borkusain ban kylli balei, hynrei um man lah iashem satia. Kumta u leit iathuh noh ha u Potiphas.

U Potiphas de u leit kylli na u Syiem Borkusain balei u Borsingh Syiem um wan phai. Hangta u sngewthuh ia ka jingthmu runar u Syiem Borkusain. U wan iathuh ha u

Piah Lyngskor bad ong ia u ba un leit noh shuwa sha Sohra. Ia lade pat u pynkhih tik ban ialeh pyrshah ia u Syiem Borkusain.

U Syiem Borkusain u tip ia ka bor u Potiphas ha ka hima. Kumta u iasuh buit bad ka tnga jong u ban pyniap ia u, bad la ioh pyniap hamar ba u dang iohthiah mynmiet.

Uwei u briew na Wah'ong u leit khail pateng sha Shilot. U leit kum iohi ia u briew uba kum u Borsingh Syiem ba u dih um hapoh ka kut u jamindar Sujlar. Mar mar u wan iathuh sha Sohra ia kaba u iohi baroh. Ki myntri Sohra de ki leit khmih bad lap shisha kumta. Ki la thaw buit ban pyllait ia u nangta, bad u la lait. U syiem u la wan poi sha Sohra hadien lai snem bad iathuh lut ia ki jingjia baroh ha ki myntri bad ka dorbar.

U Borsingh Syiem u mut ban ialethma bad u Syiem Borkusain. Hynrei u Morsing Syiem na ka jait Syiem Sohra u shah pynbām tyngka na u Syiem Borkusain bad u iashah noh bad u lem bad katto katne ki myntri. Kumta u Borsingh Syiem u shu kynriah noh na Sohra ban leit seng hima noh ha Mawsmat

6. U TIROT SINGH KA HIMA KHATSAWPHRA

(Kumba 1814-1834 H K.)

U Tirot Singh u long u Syiem Khatsawphra, ha ka por ka jingwan kiew ki Phareng sha ri lúm Khasi. U la long uba tbit ban siat khnam naduh dang khynnah.

Ha ka por une u Syiem, u Iskat Sahep (David Scott) u long u Sahep rangbah ha Gauhati. Une u sahep u kwah pom surok kulai na Gauhati sha Shilot lyngba ka hima Nongkhlaw. Kumta u la pyniadei lok bad u Tirot Singh, namar u Tirot Singh u iawan ialeit teng teng sha Borduar, ka jaka jong u ba hajan Gauhati.

La khot sngewbha ia u Iskat Sahep sha ka hima Nongkhlaw ban pynshai ia kata ha ka dorbar. Ka dorbar hadien ka jingiasaidnia bad jingiapyini nia bajur ka la iarai ban shah.

Tang shu ioh bor kumta, u Iskat Sahep u pynkiew shipai ha Nongkhlaw. U phah ar ngut ki sahep rangbah hapoh jong u. U pynshna iing dak bangla. U pynkiew ki nongshna surok na Shilot bad Gauhati.

Kine ki leh kulmar ha iew ha hat, ha jaka tong um bad khlaw thohdieng. Don ruh kiba ong ba ka Sorkar Bahadur jong ki kan sa wan jop bad iuh top ia ki ri lúm kumba leh sha thor. Kane ka la sawa sha ki shkor ki myntri Nongkhlaw.

Ki myntri Nongkhlaw ki la iadorbar harieh harieh bad ki háp jingmut ban khang noh ia kane ka jingpom surok. Kumta sdang da ka thma ir.

La pyniap ia uwei u sahep Lepton Beddingfield; katba uwei pat u lait noh. Ka Phet Syiem, ka kmie u Tirot Singh, ka iaieit ia sngewbha bad u Iskat Sahep. Kam kwah ba un iap. Ka la aibuit ia u ban phet la dang step phyrngab sha Sohra.

Ki khla-wait ka Nongkhlaw ki la beh sia sia ia u hynrei kim lap shuh. La ong ba u Iskat Sahep u pashat paisa nalar jrong u kulai katba u nang phét; bad katba ki nang ialut por ka iatám paisa ha lynti, u la nang lait noh. La pdiang sngewbha ia u da u Syiem Sohra.

Hynrei u Tirot Singh u pynkhih ia ki hima Khasi baroh ban beh noh ia ki Phareng. Bad la don ruh katto katne na sha thor Assam kiba la iarap ia u ha ka ban beh noh ia ki Phareng.

Hynrei da ka jingpynbam tyngka iá uwei na ki Syiem Khasi ka Sorkar Phareng ka la lah ban tip ia ka jaka rieh u Tirot Singh bad ka la kem ia u, hadien ka jingialeh kaba la neh saw snem.

Ki rangbah nongiapom ba donnám ha kata ka por ki la long u Mon Bhut, u Lorshon Jarain bad u Khein Kongor, bad ka thma ka la nang iaid wat hadien ba la kem ia u Tirot Singh.

La leit ialam ia u Tirot Singh sha Dakka bad la set phatok ia u hangta. U la iap noh ha phatok ha ka 29 tarik u Lber 1834. U lah ka iap kum u Syiem ha ka iing byndi ban ia ka im kum u mraw ha ka khet Khatsawphra. Hadien jong u ki hima Khasi ter shi ter ki la nang iaid sha ka kti ka Sorkar Phareng.

7. U RAJA DAKHOR SINGH KA HIMA SHILLONG

(1903 1919)

Ka Hima Shillong ka la long ka hima kaba iár shibún. La ngeit ba ka nongseng banyngkong eh jong kane ka hima ka la long ka Pah Syntiew. Kane ka la long ka kynthai ba la shu ioh kem napoh ka krem Marai ba hajan u

Lúm Shillong, da kaba pah ne khroh da u
syntiew Ka dei ma ka ruh kaba seng nyng-
kong ia ka shad ha ri Khasi.



U Syiem Dakhor Singh.

Ki Syiem kiba khraw bor ki synshar ter
shi ter ia kane ka hima. Ha kawei ka por ka


hima Shillong ka la iár naduh ki them ka wah
Brama ha Kamrup haduh ki them ka wah
Surma ha Shilot.

Hadien hadien ia ka hima Shillong la
pynpait sha ki ar hima. Kawei ka jait Syiem
ba iapait ka seng ia ka hima Myllem kaba
mynta. Kawei pat ka jait syiem ba la shah
thang la búnsien ka seng hima noh ha Nong-
kseh. Hadien hadien ka pynkynriah noh ia
ka nongbah ba nyngkong eh na Nongkseh sha
Nongkrem bad na Nongkrem pat sa sha Smit.

U Syiem pawnám bakhatduh eh
na kine ki Syiem Nongkrem u la long u Syiem
Dakhor Singh Une u la long syiem hadiet
ka jingiap u Syiem Klur Sing. Ha ka por
une u syiem ki Phareng ki la wan kiew sha
ri lúm Khasi.

U Syiem Dakhor u pynkynriah ia ka iing-
sád iingsunon na lúm Smit sha madan Smit,
kaba sah haduh mynta. U tei ruh kawei ka iing
dorbar bad kawei ka iing dak bangla. U long
uba nang bastad bad uba nang ban ri la ka
burom bad ia ka burom ka hima. U la
synshar da ka mynsiem babeit bahok bad da
ka bor ka buit baroh ban pynkiew ia ka
jingnang jingstad bad jingloh jingkot jong u
khún u hajar. Baroh kat kiba la ithuh bad
iadei kam bad u ki pyrto ia ka jinglong babha
bad jingdon akor jong u. Ka Sorkar Phareng
hi ka la sngew niiewkor shihún eh ia ki kam.

babha baroh ba u leh Kumta ka la pynkup
 noh ia u da ka nám Raja ba la tip noh ia u
 hadien habud kum u Raja Dakhor Singh. U
 la ioh ia kane ka nám ha ka snem 1914. Kiba
 ioh ia kane ka nám Raja hapdeng ki Syiem
 Khasi ki la long tang saw ngut. Kita ki la
 long (1) u Syiem Donsingh jong ka hima Nong-
 stoin (1863) (2) u Syiem Mit Sing jong ka
 hima Langrin (1874), (3) u Syiem Kinesing
 jong ka hima Khatsawphra (1903) bad u Syiem
 Dakhor Sing (1914).



U Syiem Dakhor Sing bad ka Dorbar

U Syien Dakhor Singh u la iap noh ha ka srem 1919 Kumta u la ioh ia ka nam Raja ha ka snem ba sdang ka Thma Bah Pyrthei kaba nyngkong bad u la iap pat ha ka snem ba la wai ka Thma Bah Pyrthei kaba nyngkong (1914-1918).

8 KA ASSAM

Ka hima Assam ka long ka tdueh eh ha ka liang mihngi jong ka hima India ba mynta, lait noh ka Nagaland. Shatei ne shaneng jong ka la don da ki Lúm Bah Makashang ba la khot lúm Himalaya Hangne la don ka Tibet bad ka Bhutan. Sha mihngi ne kamon jong ka la don da ki lúm Burma. Shathie ne sharum la don ki lúm Tippera bad sha sepngi ne kadiang pat la don ka West Bengal bad ka Bangladesh. Kunta hapoh jong ka don ki lúm Garo, Khasi Jaintia, Mizo, Kachar bad Naga de kiba iabteng ter ter bad ar tylli pat ki them ne thor bah jong ka wah Brahmaputra bad Surma.

Nyngkong nyngshab eh ia ka hima Assam la tip kum ka Prag-jyotisha. Hadien hadien la tip kum ka hima Kamrupa. Kane ka hima Kamrupa ka kynthup rub de ia ka shatei jong ka Bengal, ha kaba don ka Kutsh Bihar bad Rangpur.

Ka nongbah ba nyngkong eh ka la long ka Prag-jyotishpur kaba hajan ka Gauhati



Ka Map Assam

kaba mynta. Hadien kata la pynkynriah sha Kamatapur shajan Kutsh Bihar, katba ha Kamrup la synshar da ki Bhuyan. Nadien kata la pynkynriah pat sha Kutsh Bihar da u Syiem Narayan uba kiew khet ha ka snem 1540 H. K.

Kawei ka jaitbynriew Tai ne Shan kaba donbor shibun ha ki thain Shaina ka wan hiarthma sha Brahmaputra. Ka seng la ka hima ba la khot ka hima Asem (ne Ahom). Kane ka wan hiarthma naduh ka snem 1228 H K. Dei na kine ki nonghiarthma badonnán ba sa long ka hima Assam kaba mynta. Ia ka ktien jong ki la khot Assamia Imat eh kane ka ktien ka wan na sha ka hima Magadha (ba la khot Bihar mynta) ha ki por ki Syiem Gupta bakhraw.

Kaba ngi da tip thikna bha shaphang ka Assam ka long eh naduh ka jingwanjngoh kai uwei u Pukir Shaina bastad, uba kyrteng u Houen Tsang (ne Yuan Chwang). Une u la buh jingthoh shibun shaphang ka ri Assam kaba ha kata ka por. U iathuh ba ha ka hima Kamrup ha kata ka por, la shong da ki briew kiba lyngkot ka rynieng, kiba lam fong snieh doh bad kiba beit hok. Ki iapher khyndiat ka ktien na kiba shòng sha pdeng India.

Kumta ngi shem ha ka ktien Khasi hi ruh bún bún ki ktien Aryan ne Sanskrit ha ka iakren iakhana, ka ktien ka thylliej. Kane ka leit long kumta imat na ka ialeit iawan ha ka leit iew leit hat ne ha ka iaiaid lynti syngkien.

9. U KUMAR BHASKAR VARMAN JONG KA HIMA KAMRUPA

(606-650 H K)

Naduh ki por barim bajah haduh ka snem 1826 ia ka Assam la synshar hi da ki syiem jong ka hi. Ha bun ki sien kine ki Syiem Assam ki ju iateh lok teh jor bad ki patsha bakhraw jong ka ri India.

U Syiem banyngkong eh uba iateh lok bad ki Syiem India u la long u Kumar bhaskar Barman. Une u la synshar ha Assam ha ka por ba u Harshabardhan u synshar ha ki thor ka wah Ganga. Ngi don ka jingthoh jingtar une u patsha bakhraw ka ri India uba la synshar ha ki snem 606 6 8 H. K.

Uwei u nongkit-tien-syiem jong u Bhaskar Barman u la leit rah ki jingai bakordor kum ki mawkordor, ka jingthaiñ jaiñ, ki jaiñ rusom ki stieh snieh, kaiphul, kwai, ki kot ki sla ba la thoh itynnat eh, bad kawei ka shatri

jadu. U Harsha ruh u la pdiang sngewbha ia kita bad u la phah pli ki jingai sngewbha sha u da ki briew ki baheh bahaiñ.

Ha kata ka por la don de u Nongiaid pukir Shaina badonnám sha India. Uta u la long u Houen Tsang (Yuan Chwang). Une u Houen Tsang u la wan jngoh kai ia u Bhaskar Barman bad ia ka ri Assam. Une u iathuh ia u Harsha shaphang u Bhaskar. Kumta u Harsha u la khot sngewbha ia u sha Kanouj, ka nongbah jong u, ha ka jingialang bakhraw. U Bhaskar ryngkat bad u Houen Tsang ki la ia leit ha ka snem 644 H. K. Ka jingiaid lynti ka la long kaba jngai 90 sngi bad la synran ia ki da ki hati sanspah tylli. Ha kawei pat ka jingialang kaba ha Allahabad, u Houen Tsang u la leit rah sha Shaina tang ia ka jir gai sngewbha ba ioh na u Bhaskar Barman. Kata ka la long ka jaiñ tawah tyrpeng ba la pynpúr itynn timer da u shñiuh mrad.

U Houen Tsang u thoh kumne shaphang ka Assam —

Ka ri Kamrupa ka heh kumba 1,700 mail pyllun. Ka ri ka long kaba seisoh kaba don kyrhai ki schphán bad ki snepkor. Ka jinglong ka bneng ka long kaba sngewtynnat. Ki briew ki long kiba shida mynsiem bad babeit jingmut. Ki long kiba lyngkot ka ryngnieng, bad kiba byrtem ka snieh doh. Ka ktien jong

ki ka iapher tang khyndiat na ka ktien India. Ka jinglong briew jong ki ka long kaba dar-dar bad kaba dom briew. Ki long kiba lah ban bat jingkynmaw bha bad kiba minot ban stad.

Ki ngeit ka niam banylla. Ki dwai ha kaba jarjar. U Syiem uba ha kata ka por u dei na ka jait Syiem hyndai jong ki Narayan Deb. U Syiem uba dang synshar u long u Bhaskar Barman ba la ai nám Kumar.

Sha mihngi jong kane ka ri la ker da ki lúm. Ki briew kiba shong shata ki dei ki Man na ki Shaina. Shathie pat don kynhún kynhún ki hati khlaw. Kumta la pyndonkam da ki hati ban ialehthma ha kane ka ri.

Ka hima u Bhaskar Barman hi imat ka iar haduh Shilot namar la shem ki pliang tama kiba pyni ia kata. Ka kynthup ia ka Assam baroh kawei, lait noh ki lúm Naga, Miso, Manipur bad lehse kiwei de; hynrei ka tda shaduh Bhutan bad ka Bengal ba shaphang shatei.

Ha ki sngi khatduh jong u Bhaskar Barman u la phah jingai sngewbha da ki jingri, ki kulai bad ki riam ki beit ba itynnad ia ki shipai sha ki nongwanhiarthma ba na Shaina hadien ka jingiap u Harsha.

10. KA JINGSYNSHAR KI SYIEM AHOM (1603-1641)

Hadien u Bhaskar Barman la mih bún bún kiwei pat ki jait syiem kiba synshar ha Assam. Kine ki knieh ia ka bor synshar ki syiem Kamrupa bad seng hima la ka jong ka jing-synshar Ahom. Kine ki wan na sha mihngi, na shaphang Shaina ne Burma. Ia kine ki syiem la khot ki Syiem Ahom bad ki sdang synshar naduh ka snem 1228 H. K.

Hapdeng kine, u Syiem uba donbor eh nyingkong nyingshab uba ialeh pyrshah ia ki syiem Mughal u la long u Suhungmung lane u Dihingia Raja (kata, u Syiem Dihing). Ha ka snem 1504, katto katne na ki Naga ki ialeh pyrshah ia une u Syiem Suhungmung. U la phah ialeh da ki ar ngut ki rangbah shipai jong u, u Bar Gohain bad u Burha Gohain. Ki Naga ki shah jop. U Syiem Naga nangta u phah la ka khún bad sawspah ki hati kum ka dak ka jingnguh Syiem ia u Syiem Ahom.

Hadien pat ha ka jingialeh bad ki Mughal u la pynlong rangbah thma da u Syiem Naga uba kyrtengu Thawmung Lunhtao, (ba la khot noh u Barpatra Gohain). Ki Syiem Mughal ki phah shipai hapoh u nongialam ba rangbah jong ki u Turbak. Hynrei da ka jingstad-buit

tuh jong une u rangbah Naga, la ioh pyniap ia u Turbak bad ka jingduh ka la long kaba khraw na ka liang ki Musulman.

Hadien jong une u Syiem la kiew khet da u khún jong u, bad hadien jong u pat da u Susengpha, lane u Pratap Singha (ba la tip pat hadien kum u Burha Raja lane u Syiem Tymmen) U Syiem Jaintia uba kyrteing u Jasa Manik (1612—25), u tyrwa ia la ka khún ha u, lada u iaid lyngba ia ka hima Kashari ban wan shim ia ka. Kumta la long ka thma hapteng u Pratap Singha u Syiem Ahom, bad u Pratap Narayan, u Syiem Kashari. Ha kaba khatduh la lah u Pratap Singha, u Syiem Ahom, bad u la ioh wan shim ia ka khún syiem Jaintia. Kumta u la long u pyrsa kurim jong u Syiem Jaintia.

Hadien kata ia ka Assam la wan hiar thma da ki Musulman na Bengal. U Pratap Singha u la kylli ia ka daw balei ki kwah wan hiarthma. Ki Mughal ki la jubab ba ki dawa dieng, sohmarit, hati bad ksiar. U Pratap u la bitar bad u la ong, 'Ngan nym ai wat shisla siej, lymne sohmarit khlaw, lymne shisymbob u shyiap na wah Brahmaputra. Ynnai ia ong shaphang ki hati,' Kumta la khie ka thma kaba jur bad ka la neh haduh shiphew snem.

Baroh ar liang ki la iashah jop búnsien, Hynrei u Pratap Singha u leit donbok ba

u don uwei u rangbah thma badonnám ba la khot Memai Tamuli Besburua. Ki briew ki shait khot ia u u Mama, ba u dei u Mama u Syiem. Une u mama da ka jingstad jong u u la lah ban pynwan ia ki Mughal ban ia kohnguh iasuk noh ha ki jingtyrwa jong u. Ba ki la iathait, la ialut iasep bún bad ba la iaïap bún bún na baroh ar liang, ki la iasuk noh. Ka pud ka sám ka la háp biang kumha ka por u Syiem Suhungmung (lane u Raja Dihing).

11. U SUTYINPHA LANE UJ AYADHWAJ SINGH

(1648-1663)

Hadien jong u Pratap Singha la búd sa ar ngut ki syiem kiba tlot bor. Hadien jong ki pat ki myntri ki la pynkiew khet ia u Sutyinpha (ia uba la tip noh hadien kum u Jayadhwaj Singh).

Dei ha ka por ka jingsynshar jong u ba la jia ka jingkulmar hapdeng ki khún syiem u Shah Jahan u patsha ka hima Mughal, ban iaknieh ia ka khet Delhi. Kumta une u Syiem Ahom u la phah arngut ki rangbah shipai ban beh noh ia ka kynhún shipai Mughal haduh ka wah Kartoa, ka pud rim jong ka Assam. Uwei na ki rangbah shipai Ahom uba dei hi u para jong u Memai Tamuli Besburua, u dei u rangbah

shipai ba donnám jong u Pratap Singha. Ka thma kaba jur la ialeh hapteng ki shipai Mughal bad ki shipai Ahom. Ha kaba khatduh ki shipai Mughal ki la háp kynriah haduh Dakka, ha ka snem 1660.

Ha kata ka por u Aurangseb u la kiew ha ka khet ha Delhi. Hamar kata ka por don jingkulmar pat hapteng ki rangbah shipai ka Assam. Ka rukom pyniaid thma ha kata ka por, ka long ba wat tang u ksai ba ioh bat na ki nongshún u kylla long u jong ka hima Assam baroh kawei. Dei ban pynpoi sha u syiem bad ka hima tat haduh ban da rai kumno yn leh da u Syiem bad ka hima. Hynrei don na ki shipai bad rangbah shipai kiba leh lyndet ia kane ka rukom pyniaid thma.

U Syiem u la phah da uwei u rangbah syiem ban tohkit ia kane. Kane ka jingleh ka la pynmong wat ia u kthaw-kurim u Syiem hi, uba kyrteng u Shangmung. Kumta ki lai ngut ki rangbah shipai bakynsai tam ki la iaphoi bad u Syiem bad kim treh ialehthma ha ka rukom kaba dei.

U Aurangseb pat u la phah da u rangbah shipai badonnám jong u, uba kyrteng u Mir Jumla ban leit jop biang ia ki jaka ba la duh ha Assam bad Kutsh Bihar.

Ka jingialeh ka la long kaba jur. Shipor la pynher krad ia ka kynhùn shipai Assam, la ioh knieh ia ka nongbah jong ka, ka Gargoan, bad la pynphet ia u Syiem Assam shaduh ki tduh ba sha mihngi jong ka hima.

Hynrei ha ka por slap, ki shipai Assam ki wan hiarthma tu i mynmiet mynmiet. U Mir Jumla u la don ha ka khim khair. Ym don bām don dih. U, ia lade ruh u la ioh pang. Ym lah ioh khubor shuh na sha la ka rima la jong. Ia ki lynti syngkien la dk'at bad ka jingiap bad jingjulor ka ham kai shuh. Ki shipai Mughal ki la duh jingkyrmen thiaw

Hynrei tang shu poi ki nai synrai, la wan poi ka jingiarap na Bengal. Ka lynti ka syngkien kam ktieh shuh bad kam wit. Kumta ka kynhùn shipai Mughal ka la sngew lait mynsiem wo. Ki rangbah shipai Assam ruh kim treh ialeh ha ka rukom ba dei. Kumta da kaba jem la ioh biang ia ki bynta ba la duh da ka kynhùn shipai Mughal.

U Syiem um banse shuh ban tyrwa iasuk noh. U la kular ban phah ia la ka khùn sha ling-Syiem u Patsha Aurangseb bad ka spah ka hajar nalar ki hati ban pynbiang ia ka jinglot jingsep ha thma. Ka thma ka la wai ha ka snem 1663 bad u Mir Jumla u la leit phai noh sha la Bengal, hynrei u la iap noh tang hapdeng lai bnai.

U Syiem Assam ruh u la pynshitom jur ia
 ki rangbah shipai jong u hadien ka thma.
 Hynrei u ruh u la iap noh shen ha kajuh hi ka
 snem.

12 KA JINGIALEH U LASHIT BARPHUKAN

(1667-1671)

U Lashit Barphukan u la long u khún khat-
 duh jong u Memai Tamuli Besburua. Une
 u Memai u la long u rangbah nongialam shipai
 badonnám pyrshah ia ki Mughal ha ka por ki
 Patsha Jehangir bad Shah Jahan. Une u Memai
 (kaba mut u Mama) u la long u kthaw kurim
 jong u Syiem Jayadhwaj Singha. Kumta u
 khún u bit bad kem ia ka jinglong u kpa
 jong u ha kiei kiei baroh. U ju sngap bad iohi
 ruh kumno u kpa jong u u pyniaid kam pyn-
 iaid dam bad ki rangbah jong kata ka por. U
 don ka khmat kaba pyllun peit pyrshah kum
 u nei khatsawsynñia bad ym don ba nud peit
 pyrshah ia u.

La thung rangbah nongialam ia u Lashit
 Barphukan namar la shem ia ka jingtbit,
 jingsngewrit bad jingkitkhia jong u ia la ka
 kamram. Hapdeng ar bnaí u la lah ban beh
 noh ia ki shipai Mughal shaduh ka wah

Manaha, ka pud rim jong ka Assam. Ia ka shnong Gauhati la ioh knieh bad ia u gobarnor Mughal la ioh kem.


Hynrei u Lashit Barphukan um sangeh noh tang hangta. U la tip ba kan wan ka jinghiarhma pynhiarkput bajur biang na ki Mughal. Kumta u la pynkhreh jriang ia ka jingialeh bajur. La pynkhlain ia ka kut Gauhati na baroh sawdong. La thung bún bún ki rangbah shipai bad ki nongialam bashlur bad ba shynrang mynsiem. La tei ki kut bakhlain ha ki lum batawiar ia ka Gauhati. La pynkhlain ia ki lieng ban ialeh thma na um. La tih ki kharai kiba mynsaw bad la pynap klep da ki phrah siej banep. La pynbiang ki r'ar ki tar thna babiang, bad tup bad mán bad khnam bad ryntieh bad sum bad stieh, bad wait bad sdie, nalor ka bám ka dih kyrhai La pynap briew mán ka shiphew khatsan pruh. La phah nongsyntiat ban bud ia ka jingwan iarap na sha Bengal ne na Delhi. Ia kiei kiei baroh la pynbeit pynbiang thik thak.

Ha u bnai khatduh ha ka snem 1667, u Patsha Mughal u la ioh khubor ba la knieh ia ka Gauhati. Mar mar u la phah ia u Raja Ram Singha badonnám jong ka kynhún nongialam Mughal. U long uba la iashim bynta ha ka thma pyrshah ia u Shibaji, u Syiem Mahratta, bad ia ka nám jong u la bna kylleng ka ri India.

U tang shu wan u la dawa ba dei ban pyllait ia ka Gauhati sha ka kti ki Mughal. Hynrei u Lashit Barphukan um patiw. Haba u iohi ia ka bor u nongwanhiarthma, um treh iamih madan. U shu pynlong bun ki jingialeh-thma rieh mynmiet mynmiet. Kane ka la pynjulor ia ka tiar ka tar ki Mughal bad pyniap bun ki briew.

Shisien namar ba la pynbor eh da u Syiem Ahom, u Lashit um banse ban iapynmih madan ban ialeh bad u Raja Ram Singha. U iathuh ba un sei ar hajar ngut ki shipai haba ha ka jingshisha u pynap saw hajar. U Ram Singha ba u la sngewpoh ban ialeh bad u, u la phah nongialam da ka nongialam shipai kynthai ha khmat ki shihajar ki shipai. Hynrei ynda u iohi ba u Lashit u leh thok, u pynmareh da ki shipai shongkulai hamar ban kut ka jingiakob bad la pyniap shiphew hajar na ki shynrang ka wait jong u Lashit, shuwa ba kin lap ba poi hapoh kut. Kane ka la pynrit mynsiem ria ia u Lashit. La katta ruh um man dem hi.

U Raja Ram Singha tang shu tip ba u Lashit u pang, u sdang ban ialeh ban knieh ia ka kut Gauhati da ka jingialeh ki lieng na wah. U la iohi ba ka liang na u Lûm Khamakhya ka la long kaba i-tlot. U Lashit, uba nang peit na jynghiah pang nator lûm u la iohi ba baroh ki lieng kin sa leit nguh leit



Ka templ ha u lum Kham:khya.

dem ia u Raja Ram Singha. Kumta na jynghiah
 u la khie joit ban hiar ha lieng ban leit ialeh.
 Kane ka la ai mynsiem ia ka kynhún shipai
 Assam. Ki la ia am dukhi khait bad da ka jingia-
 ther dohiap bad ialeh iap bən ri la ka jinglong
 laitluid ba naduh barim bajah, ki la jop thiaw
 bad ki la beh krad bad pynher khynrad ia ki
 lieng bad shipai Mughal. Riap riap ki beh
 bad u Lashit u dkut mynsiem thoin, hapdeng
 ka jingiohi ba u la lah ban loit ban law ia ka
 jinglongmraw ka ri la ka jong bad ka jaitbynriew
 na ka kti ki nongshún. Kane ka la jia ha ka

snem 1671 saw snem hadien ba la thung
rangbah nongialam ia u.

Ka hima Assam ka la lait na ka kti ki
Patsha Mughal bad ka sah khlem háp hapoh
ka jingsynshar India tat haduh ka snem 1826,
ha kaba wan ka jingsynshar Phareng

13 KA JAYMATI BAD KI KHUN KI KSIEW JONG KA.

(1681-1780)

Kat kum ka rukom ki Syiem Ahom, u
myntri rangbah lymne u rangbah duh jong
ki shipai um lah ban kiew ia ka khet jong ka
hima. Hynrei la don u myntri rangbah uba
kwah ban ioh ia ka khet ki Syiem Ahom bad
uweí u rangbah shipai u la pyniap noh ia u
myntri rangbah na kata ka daw. Ynda uta
u rangbah shipai u shem ba ym don mano
mano shuh badonbor ban shimti ia ka hima
lait na u, u la thmu ban pyniap ia u khynnah
syiem ba dei hok jong ki Ahom. U Syiem
Gadadhar Singha tang shu iohsngew ia kata
u la her krad ryngkat bad la ka inga jong u,
ka Jaymati. Tang shu iohsngew ia kata, une u
rangbah duh ki shipai u la wad ia u, u la thiew
kumba thiew ñiut ia ka hima baroh kawei.

U Gadadhar u la long u riewradbah ha ka
rynieng rynnñiot, bad uba khlain shibún. U lah

MEGHALAYA STATE CENTRAL

LIBRARY SHILLONG

ban bām da u khaw kat uba ioh bad da ka doh ba shu syang ha dpei ding. U lah marwei ban pynliem haduh khatsan arphew ki shipai. U la iaid na khlaw na khlaw bad poi haduh kumba arphew mail na pud ka hima Ahom ha kjat ki lúm Naga. Hangta u rangbah duh ki shipai u la ioh jingtip ba u iadon hangta bad la ka mahadei jong u ka Jaymati. U la ai hukum ia la ka kynhun shipai ban ker kut ia kata ka jaka. Ka tnga jong u, ka Jaymati, ka la pynbor ia la u tnga ban phet iap, hynrei u la iakhing shipor, tat haduh ba ka ong ba lada um leh kumta, kan shu pyniap noh ia lade khnang ban pylla t im ia u. Kumta u la phet bad iehnoh ia ka marwei kumba ka kwah.

Ki shipai ki la wad ia ka iing ka sem jong ka ha kaba ka rieh bad ki la lap ia ka. Ki la wanrah ia ka da kaba shu pynbor ia ka ban iaid kjat sha u rangbah shipai bad ka la shim por kumba artaiew ei-ei. Ka la thait ym don pyrthei shuh Nangta u rangbah duh ki shipai u la ong ia ka ba kan iathuh hangno u tnga jong ka u don ; bad namar ba kam iathuh la teh ia ka ha u dieng : la sympat, la pynsaja jur ia ka, bad la pyniap ia ka hangta.

Hadien kata u Gadadhar u la iohsngew ia kata, u la lum la u shipai u swar jong u, u la wan ban pyllait ia ka, u la jop ia uta u rangbah shipai ba knieh ia ka khet na u ; hynrei u la

poi dier por eh namar ka tnga jong u ka la lah iap.

Ka Jaymati ka don arngut ki khún shynrang, kiba kyrting u Lai bad u Lashai. U Lai u la kylla long Syiem Rudra Singha hadien jong ka jingiap u kpa jong u. Une u Rudra Singha u khún nyngkong ka Jaymati, u la tih kawei ka nan bah nan san ha Sibsagarh ba la ai kyrting ka duriaw ka Jaymati lane Jaysagar haduh mynta. Ka long ka nan baheh tam hapoh Assam. U la tei ruh ka templ harud kata ka pung bad la khot kyrting ia ka ka iingmane ka Jaymati lane ka Jaydol. Hapoh kane ka templ don u mawlyngknep uba sngem bad jrein um barabor haduh kine ki sngi. La ong ba u long ka dak jong ka jingjrein snam bad jingjaw ummat pait dohndud ka laymati haduh mynta mynne na kane ka jingshah pyniap.

U Rudra Singha u don bün ki khún shynrang bad u pynkular la ki khún ba yn nym kiew khet ia ka khet jong u da ki ksiew jong u, katba ki baroh shipara ki dang ia im. Kumta ynda u iap u Rudra Singha, ia ka khet la kiew nyngkong eh da u Siba Singha, sa u Pramatta Singha, sa u Rajeswar Singha, khatduh eh u Laskshmi Singha lait noh uwei pat ba uba anna ka met ka phad. Nadien jong kine ki syiem ka hima Ahom ka la nang troin nang troin tat haduh ba la shimti ia ka da ka Sorkar Phareng na Bilat.

14. KA ASSAM NADIEN U LAKSHMI
SINGHA HADUH KA JINGWAN
SYNSHAR KI PHARENG

(1780-1825)

U **Gaurinath Singha** (1780-1795)—Hadien ka jingiap u Lakshmi Singha ia ka khet ha Assam la kiew khet da u khun jong u, u Gaurinath Singha. Une u la long u khun ioh-mon bad leh mon bad kumta u shem jingjynjar shibun ban pyndem ia ki briew ba-ieng ialeh pyrshah ia u, ki Moamaria La u jop ia ki hawei, ki pynshitom ia u hawei pat, khek shi khek ter shi ter. U u la hap phet na ka nongbah Rangpur sha Gauhati bad ieh ia ki myntri korbari ba kin ialehthma na Jorhat. Katba dang jia kumta la wan mih pat sa ki nonglute nongpynjutor na Bengal ban lute kai bad pynjutor ia ki nongshongshnong ka Assam. Um banse shuh ban pan jingiarap na u Lord Cornwallis, u Gobarnor rangbah duh jong ka ri India, ban beh ia ki bad ban pynioh pat ha u ia ka nongbah. U Kapten Welsh bad la ka kynhun shipai bakhlain jong u u la wan iarap ia u ban pyndem ia ki nongiakhih ialeh pyrshah bad ban pynioh pat ia ka Rangpur, ka nongbah jong u. Ia u Gaurinath la pynkiew khet bad u Kapten Welsh u la leit phai biang sha Calcutta, ynda ki la iathoh iatar ba yn iapynroi ia ka khaii ka pateng hapdeng ki ar hima. Une u syiem u la iap noh ha ka

iingjaiñ jong u kaba ha Jorhat ha ka snem 1795, ynda u la synshar 15 snem.

U Kamaleswar Singha (1795-1811).—Hadien ka jingiap u Gaurinath Singha, ym lap khun syiem satia babit ban kiew ia ka khet Assam. Kumta la donkam ban wad syiem uba bit ban shimti ia ka khet syiem. Khatduh khatwai ynda la wad la wad la lap da uwei u khynnah syiem uba long u ksiew tun ne ksiew miaw jong u Raja Lashai, u para u Lai ne u Rudra Singha la une u khynnah syiem uba kyrteng hok u Kinaram Gohain la jied syiem bad u la shim ia ka kyrteng Kamaleswar Singha. Ha ka por jong une u syiem la don ka jingiathoh iatar bad ka jingiaphah nongkit-tiensyiem hapteng jong u bad u Ram Singha, u syiem Jaintia. Une u la synshar khathyn-riew snem haduh ka snem 1811.

U Chandrakanta Singha (1811-18; 1819-1821).—Ynda u iap u Kamaleswar Singha la kiew khet pat da u para jong u u Chandra-kanta Singha. Hamar ka jingsynshar jong u la wan hiarthma ki Burma ba kumta ki rangbsh myntri jong u ki pynhiar khet noh ia u ha ka snem 1818, bad la pynkiew khet pli da u Purandar Singha, u ksiew jong u Rajeswar Singha. U Purandar Singha um lah beh ia ki Burma, bad u la phet krad ia lade bad iehnoh ia la ka ri ha ka snem 1819, tang shisnem hadien. La pynkiew khet hiang sa shisien ia

u Chandrakanta da u rangbah Burma ha ka snem 1819. U Chandrakanta u la ialeh biang pyrshah ia ki Burma, hynrei ba u shah jop u la phet iap sha Bengal.

U Jageswar Singha (1821-1825)—Ki Burma ki la pynkiew khet noh da u Jageswar Singha tang ban syrpaï syrpuð pynjem pyntuid ia ki paidbah, hynrei ki la shimti ia ka jingsynshar ha la ka kti naduh ka snem 1821 haduh 1825, saw snem. U Chandrakanta Singha u la lum ia u phud u pyrton shipai bakhraw ban ialeh biang ia ki Burma ha ka snem 1823, hynrei um lah, kumta u la her krad biang sha Bengal. Hynrei u Iskat Sahep u wan shimti ia ka Assam na ka kti ki Burma ha ka snem 1825, bad naduh kata ka por ka Assam ka la hap ha ki kti ki Phareng, shispah snem tam, tat haduh ka jinglaitluid ka ri India na ka jirg-synshar Phareng ha ka snem 1947.

15. KI JINGKYLLA HA KA JINGSYNSHAR ASSAM.

Ka hima Assam ha ri thor ka la wan hap hapoh ka jingsynshar ki Phareng naduh ka snem 1826, ha ka por ba u Lord Amherst u long Governor General jong ka ri India. Ka ri Khasi pat ka la wan hap naduh ka snem 1833 ha ka por ba u Lord William Bentinck u long Governor

General ha India ha kaba u Syiem Tirot Singh u shah jop. Katba ka ri Jaintia pat ka hap ha ka snem 1862 ha kaba shah jop u Kiang Nongbah, ha ka por u Lord Elgin u Viceroy jong ka Maharani Victoria. Kine ki la wan rung hapoh ka jingsynshar ki Phareng ryngkat bad ka Assam, ha kaba ka Shillong ka long ka nongbah jong ki Ka Garo, ka Lushai bad ka Naga ruh ki la wan hap hadien, hapoh ka jingsynshar ki Phareng ryngkat bad ka Assam, katba ka hima Manipur bad Tipura ki long hapoh ka jungiada ki Phareng shabar ka hima Assam.

U Lord Northbrook u Viceroy ha ka por ka Maharani Victoria u la long uba nyngkong eh ban wan jngoh ia ka Shillong ka nongbah jong ka Assam.

U Lord Curzon u Viceroy ha ka por u patsha Edward VII, u la pyniasoh noh ia ka Assam bad ka Bengal mihngi ban long kawei ka jylla hapoh u Lieutenant Governor, bad ka Dacca kum ka nongbah jong ka.

Hyndrei ha ka por u Lord Hardinge, u patsha George V bad ka Mahadei jong u, ha ka jingwan jngoh jong ki ia ka ri India, u la pynbna ba ka Assam kan ioh noh la ka jylla hapoh u Chief Commissioner. Ka Shillong ka la kylla long biang ka nongbah jong ka Assam. U Sir Beatson Bell u la

long u Chief Commissioner uba khadduh eh bad u Governor uba nyngkong eh jong ka Assam.

Ynda ha ka snem 1947, haba ka ri India ka la ioh laitluid, kine ruh baroh ki la wan hap hapoh ka jingsynshar laitluid ka India lait noh ka distrik Sylhet.

Ki riwllum Naga ki la kwah noi, ban ioh ka jinglaitluid ba kyrpang ban synshar hi. Ka ri India ka la ai ia ki ban ioh la ka jong ka hima ri lum ba kyrpang hadien.

Ynda ha ka 20 tarik u 'nai Kyllalyngkot jong ka snem 1972, ka Indira Gandhi ka myntri rangbah jong ka ri India ka la her helikoptar sha Arunachal Pradesh ban ai ka hima laitluid ri lúm ba kyrpang hapoh u Chief Comissioner uba long beit hapoh India

Ha kajuha ka sngi ka la ai ka hima ri lúm ba kyrpang ia ka ri Khasi, Jaintia bad Garo ban khot noh da ka kyrteng thymmai Meghalaya.

Ha ka sngi kaba bud ka la her helikoptar biang sa sha ki hima ri lum Manipur, Tripura bad Mizoram. Ki hima Manipur bad Tripura kiba long kyrpang mynshuwa shabar Assam kin long noh hapoh

ujuh u Governor jong ka Assam kumba long lem ka Meghalaya bad Nagaland, katba ka Mizoram ba la khot mynshuwa Lushai Hills, kan long hapoh u Lieutenant Governor, uba long beit hapoh ka ri India. Ka nongbah jong ka Assam ba ha ri thor kan long noh ka Dispur hajan Gauhati ha ka jaka ka Shillong.


Ka hima Assam ri thor ryngkat bad ki hima ri lum, ka Meghalaya, Nagaland, Tripura bad Manipur kin long hapoh ujuh u Governor ka Assam.

Kine baroh ki hima ryngkat bad ka Arunachal Pradesh lem bad ka Mizoram, ki la iateh song bad synjuk lang ban long kawei, la khot lang ia ki Ka North Eastern Circle. Kane kan iapeit iakhmih lang ia ka jingpynbeit ia ki lynti ki syngkien, ka rep ka riang, ka bor llektrik, ka jingpynbiang ia ka Dewbilat, bad ha ka Khaii pateng.

KA MAPASSAM

BAD KI HIMA RILUM

- ~~~~~ Ka wahbah
- - - - Ki shnatwah
- o Ki pud District
- o Ki Shnang
- ~~~~~ Ki Lynti Rel



1. Thoh jingiathuhkhana shaphang ka ri
Khasi Jaintia bad nangno ki Khasi ki wan.

2. Iathuhkhana shaphang uwei na ki
syiem bapawnam eh jong ka Hima Madur-
Maskut.

3. Iathuh katba phi tip shaphang u Niang
Raja.

4. Iathuhkhana katba phi tip shaphang
u Sajar Nangli.

5. Iathuh shaphang ka jingshahset (a)
u Syiem Borkusain ha Nongkrem, lane (b)
u Borsingh Syiem ha ka kut u Sujlar.

6. Iathuh katba phi tip ia ka thma u
Tirot Singh pyrshah ia ki Phareng.

7. Phi tip aiu shaphang u Raja Dakhor
Singh bad ka jingsynshar jong u ?

8. Thoh lyngkot shaphang ka Hima
Assam bad ia ka jingsynshar jong ka naduh
barim bajah haduh ka jingwan synshar ki
Phareng, da ai bad ki snem kiba donkam.

9. Iathuhkhana shaphang u Syiem Assam
banyngkong eh uba iateh-lok bad u Patsha
India badonnam, u Harshabardhan.

Lane

Iathuh ia ka jingai jingthoh jong u Pukir Shaina badonnám shaphang ka Assam bad ki briew jong ka.

10. Iathuh khana shaphang ki Syiem Ahom, u Suhungmung bad u Susengpha.

11. Ai jingiathuh shaphang u Sutyinpha ha ka jingialeh jong u pyrshah ia ki Patsha Mughal ba na Delhi.


Lane

Iathuh katba phi tip shaphang ka jingwan hiarthma badonnám u Mir Jumla ia ka ri Assam.

12. Thoh jingiathuhkhana shaphang ka jingpyllait-luid u Lashit Barphukan ia ka Assam na ka kti u Patsha Aurangseb.

13. Iathuhkhana katba phi tip shaphang ka Jaymati.

14. Iathuh lyngkot ia ka jingsynshar ia ka ri Assam naduh ka por u Gaurinath Singha haduh ka jingwan synshar ki Phareng.



**Ia kine ki kot skul, kollej bad pule
 paidbah lah ban ioh na ki nongthoh
 kot hi, lane na ki dukan die-kot
 Khasi kiba ha Shillong,
 Jowai ne Sohra :—**

**Da i Kong Beatrice Mittre,
 Jaiaw, Shillong.**

1. Ka Histori jong ka ri India (IV-VI) ... 5T.

**Da u Bah Frank M. Pugh,
 Jaiaw Shillong.**

- | | | |
|---|------|---------|
| 2. Ka kot Hygiene (IV-VI) | ... | ... 4T. |
| 3. Ka Kot Geography (IV-VI) | ... | ... 6T. |
| 4. Ka Ilistory jong ka ri Khasi & Jaintia (IV-VI) | .. | 2T. |
| 5. Ka Phawár-Rwái Khasi | ... | ... 5T. |
| 6. Ka Prosodi bad Retorik | | ... 4T. |
| 7. Ka shem-lanot u Macbeth | ... | ... 4T. |
| 8. Ka Jinglar ka Ktien Khasi I | | ... 6T. |
| 9. " " " II | ... | ... 7T. |
| 10. Ka Sawangka ia ki Saw ngut balap mynsaw | | ... 4T. |
| 11. Ka Isid Synran ha ka Pross B. A. Khasi | | ... 7T. |
| 12. " " Poetry " " | | ... 7T. |
| 13. Ka Gulapi (Ka Khana India) | ... | ... 4T. |
| 14. Ka Shang Khmih-Pyrthei u Lord Clwyd | | ... 3T. |
| 15. Ka Tem Ding ia ka Shla-Brlaw | | ... 5T. |
| 16. Ka East Lynne Kitab I (a) | | ... 2T. |
| 17. Ka East Lynne Kitab I (b) | ... | ... 2T. |
| 18. Hynrei mynta Ngi lalong Khristan | | ... 2T. |
| 19. Ka Jingim lajong u John B. Gough I | | ... 2T. |
| 20. " " " II | | ... 2T. |
| 21. Ka Sawangka Kii San Ngut Ba Iap | | ... 3T. |
| 22. Ka Dialok Nangnq u Khasi | reng | ... 5T. |
| 23. Ka Kot Iarap B.A. III | ... | ... 2T. |